

«La nova partida da coaliziun»

Partida liberaldemocratica ils liberals

DA GION NUTEGN STGIER / ANR

■ **Il 2016 saja in onn per dar dapli paisa a la politica reala, ha ditg cusseglier guvernativ Christian Rathgeb. Il referent da la saira Claude Longchamp è da l'opiniun che la pld saja betg ina partida uschè da vart dretga sco adina pretais.** Tradiziunalmain ha l'apéro da Bumaun da la Partida liberaldemocratica ils liberals dal Grischun (pld) gù lieu en il chastè dal viticultur *Gian-Battista von Tscherner* a La Punt/Rehanau. L'interess per quel è stà fitg grond e blers liberals èn segir er vegnids per assister al referat da *Claude Longchamp*, il politolog ed istoricher. Tema central da ses referat: Las partidas suenter las elecziuns naziunalas 2015. Sin il program è er stà il pled per l'onn nov da *Christian Rathgeb*, cusseglier guvernativ e president da la regenza.

La davosa giada il 2007

El ha ditg che l'onn 2016 saja per la pld grischuna in onn impurtant senza elecziuns ed uschia cun bler temp per sa deitgar a la politica reala ed a la tgira da las secziuns regiunalas e localas da la pld. El saja er sco president da la regenza pront da visitar las secziuns dals liberals en l'entir chantun, ha ditg Christian Rathgeb. A partir da l'avust haja la pld cun *Michael Pfäffli* er il president dal cussegl grond en sia retscha dasper. La davosa giada che la pld haja gù il preident da la regenza ed il president dal cussegl grond saja stà il 2007 cun esser cusseglier dals chantuns *Martin Schmid* a la testa da la regenza grischuna ed *Agathe Bühler*, presidenta dal parlament chantunal. Il svilup economic



Claude Longchamp, il politolog ed expert da la politica svizra è stà referent tar la pld grischuna.

FOTO G. N. STGIER

en noss chantun ed il program da la regenza 2017–2020, quai sajan er dus gronds temas en la sessiun da favrer. La pld sappia contribuir bler cun sustegnair

il cler svilup economic, turissem e forza idraulica, reducir las regulaziuns e sustegnair il program d'impuls. La segirtad saja dentant er in grond tema gist en ils

proxims dis cun il Forum economic mundial a Tavau. Er la pld haja da s'occupar cun l'imigraziun cun esser la situaziun bunamain la suandanta: quietezza

avant la burasca, ha accentuà Christian Rathgeb. El haja gia incumbensà il stab cun intginas lavurs da planisaziun pervia da la procedura d'asil e las dumondas d'asil.

La pld resta autonoma

Claude Longchamp, il politolog ed istoricher, ha ditg che la pld daventia da nov en il parlament svizzer la partida da coaliziun. Ils davos otg onn saja quai stada la pcd. L'expert è er da l'opiniun che la pld restia autonoma e perquai saja ina collavuraziun pli stretga be secundara. Per la pps sajan l'indipendenza da la Svizra, la neutralità, il naziunalissem e l'immigraziun gronds temas (cun quels haja ella gù success tar las elecziuns 2015) dentant che per la pld sajan l'economia ed er l'Uniun europeica temas centrals. Tut tenor temas vegnia la pld a sa colliar cun las autras partidas da mez e schizunt cun la ps e betg cun la pps. Il spustament a dretga en il parlament svizzer, dal reminent en l'entira Europa, saja d'attribuir a la politica d'asil, ha menziunà Claude Longchamp. Per votantas e votants saja la pld bunamain memia liberala, dentant che la pps saja betg pli ina partida dretga, mabain ina partida conservativa. Gist perquai haja ella success ed ultra da quai saja ella er pli datiers a la populaziun che la pld. Claude Longchamp è persvas che èn ils proxims onns daventian l'avertadad tar l'UE e l'immigraziun temas centrals e qua vegnia er la pld ad avair sia lingua e strusch quella da la pps. En il Grischun vegnia anc adina fatg politica reala, levamain a dretga, dentant anc adina fitg dependenta da las personalitads en las partidas.